

Plataforma Hobennan Profesional 'Tienda di Ley' ta bay celebra su prome aniversario



ORANJESTAD (AAN):

Den e ultimo luna e lectoran por a nota cu semanalmente PHP pa medio di su proyecto 'Tienda di Ley' ta publica diferente articulo riba e tereno di leynan familiar.

E demanda pa haya informacion ta uno cu hopi tempo tabata existi y no ta tur ora nos leynan lo ta simpel pa compronde. E meta principal for di un comienso semper tabata pa brinda comunidad cu e asistencia huridico cual ta algo cu no tur biaha lo ta pagabel of acesibel.

Den e luna cu a pasa a dedica hopi tempo na e topico derechonan di famia y a hasi un quickscan di algun articulo den nos codigo civil.

E feedback cu nos a ricibi for di pueblo tabata uno positivo mirando cu cada diasabra cu pasa nos a haya mas ciudadano cu a acerca y confia nos cu nan preguntanan huridico. E debido consehonan ta wordo brinda y e ciudadano ta wordo guia tambe den e proceso. Un di e topiconan cu a gara hopi atencion tabata e tema di 'ouderlijk gezag', pa cual te dia di awe nos ta brindando e servicionan necesario pa yuda mayornan cu esaki.

Den transcurso di e simannan nos dilanti nos lo continua cu algun tema mas relaciona cu derecho di famia y tambe lo pone enfasis riba derecho di nos muchanan. Den futuro otro temanan cu lo bai bin dilanti ta relaciona cu nos leynan laboral, derechonan basico cu ta ankra den nos leynan penal,

leynan fiscal, derechonan humano di diferente tratanan y nos constitucion.

Tienda di Ley ta un proyecto special y diferente cu a demostra derecho di existencia. Na september benidero nos lo cumpli 1 aña sirbiendo pueblo cu asistencia huridico gratuito. Pa nos boluntarianan y huristanan den formacion e ta un placer di por sali na defensa y informa esnan cu no tin e conocimiento di nan derechonan. Pronto den nos team lo tin algun graduado for di e facultad di ley y asina nos Plataforma ta continua na crece profesionalmente.

Colaboradornan y huristanan den formacion di 'Tienda di Ley' ta spera cu e comunidad ta contento cu nos servicionan. Adicionalmente nos kier gradici e abogadonan cu ta traha tempo den nan schedule ocupa pa asisti Tienda di Ley den materianan cu ta mas compleho.

Kier pa e lectoran tene na cuenta cu varios biaha e temanan cu nos ta trata por resulta di ta mas amplio cu loke nan ta parce. E motibo di esaki ta cu no ta tur ora e ta posibel pa logra skirbi of informa di tur cos riba e tema. Si abo como lector tin pregunta relaciona cu un di e temanan cu Tienda di Ley a trata, semper bo por aserca un abogado of hurista dibo preferencia pa mas informacion den detaye.

Tienda di Ley ta brinda servicio riba diasabra di 3 pm - 5pm na Cas di partido, pueblo di Aruba ta cordialmente invita pa asisti si acaso ta desea asistencia huridico gratis.